
ПРОФЕССИОНАЛ ТАЪЛИМ ТИЗИМИДА “ФАРҒОНА ТАЖРИБАСИ” ЯРАТИЛАДИ

Учкўприк туманидаги 2-сон касб-ҳунар мактабида вилоятдаги профессионал таълим муассасалари раҳбарлари ва педагог кадрлари иштирокида анъанавий август семинари бўлиб ўтди.

Вилоятдаги 76 та профессионал таълим муассасалари мутасаддилари иштирокида ташкил этилган семинарда вилоят ҳокимининг ўринбосари Файзулло Қосимов, Олий ва ўрта махсус таълим вазири ўринбосари Садоқат Сиддиқова қатнашдилар.

Тадбирда 2021-2022 ўқув йили сарҳисоби, шунингдек, янги 2022-2023 ўқув йилига тайёргарлик ишлари муҳокама қилинди. Тизимда эришилган ютуқлар билан бирга, мавжуд муаммоларни бартараф этиш хусусида фикр-мулоҳазалар билдирилди. Жумладан, дуал таълимни жорий этиш, битирувчиларни доимий иш ўрни билан таъминлаш, замонавий касб-ҳунарларга ўқитишда янгича ёндашув, бюджетдан ташқари маблағ топиш каби мавзуларда баҳс-мунозаралар бўлиб ўтди. Келгусида амалга оширилиши лозим бўлган вазифалар юзасидан келишиб олинди.

Соҳада фидойилик кўрсатаётган ва намунали фаолият кўрсатган педагоглар ва раҳбарлар рағбатлантирилди. Уларга эсдалик совғалари, ташаккурномалар тақдим қилинди.

– Фарғона вилоятида профессионал таълим соҳасида ибратли ишлар амалга оширилаётганидан мамнунмиз. Айниқса, ёшларга замонавий ва меҳнат бозорида талаб юқори касбларни ўргатишда ўзига хос мактаб яратилаётганига гувоҳ бўляпмиз. Соҳада “Фарғона тажрибаси”ни оммалаштириш ниятидамиз, – деди вазир ўринбосари Садоқат Сиддиқова.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-08-27 10:31:33